



秋潭外集卷第七

尺牘七

長陽

馮虛躔學博



音書闊隔數載於茲積想之忱與日俱深四月中得省
 信驚聞大師母遽驟鸞馭臨風悲慕感慟實深伏惟老
 世叔至孝純篤丁此大故至哀至痛非比尋常惟念鈞
 體本非甚健且去歲聞喘氣之疾時復發動惟乞以禮
 節哀旣可以慰大師母地下之靈更可以祇承大夫子
 堂上之歡區區私忱不勝叩禱去春始悉世兄已得秋
 雋歡喜無限道遠緜緜尚羈裁賀今年想早赴春官定

得泥金信也淑莅吉三年艱瘁萬狀此閒吏民甚敝前
政虧累數逾三萬去年幸將倉穀一萬六千全數彌補
今年輪屈免糧彙銷竭力經營尙短無著萬外焦急之
懷不可言喻且楚氛甚惡淑原籍長陽已爲賊據家兄
弟眷口吉凶未卜昨雖遣人往探難得一信吉水地當
孔道復值有事之秋閩米黔餉軍興旁午無役不從西
江外雖緣飾而病敝已深如之何而可行年五十秋霜
滿髻病體羸憊去住維艱回憶陪侍京華才如昨日不
意竟墮落至此也尊體小苦平復後一切如常否至念
至念肅此耑遣家奴恭賚唁函伏祈台照附呈夏布二

十端并希叱存臨穎馳戀

馮鷺庭大史

去秋家人禾中回接奉手書并拜領大刻種種具承垂
念懃拳馳溯之衷倍增勞結道遠緜緜風塵勞吏不得
數奉音問爾後兩得師札祝文學來江從訥齋先生處
接其手簡而未得一晤具知大事已於年內蕙完不勝
慰念伏諗將次廓然起居迪寧侍奉之下頗復出遊抑
總在烟雨樓畔勤名山之業也淑束縛爲吏遂逾十年
多病奇窮進退維谷冬春之際西江多故上游謬採虛
聲年內欲調南昌幸而得免乃春閒又屬新建雖固辭
數次似未允從蒲柳之質未老向衰私逋累累旣難拂

衣而故園烽火又無家可歸外無補於公家內無濟於桑梓兩髯皤然顧影可傷閣下何以教我楚豫賊氛出沒無常近又逼近孝感去武昌僅百里蘄黃九江俱在戒嚴秦蜀之間又復滋蔓竊以目下雖不能不分兵力以撲賊而要害之處鎮守爲要晉逼秦蜀豫章皖淮青齊逼楚豫皆當有重兵宿將使么麼不敢窺伺而艸間不敢竊發忽然烏合忽然獸散賊之意正欲使我疲於奔命竭各省之力以事之非策也以西江一省而論戰兵不過三千去二而兵空撥餉每數百萬而庫空閩米楚米每數十萬而倉又空事事可爲寒心恐各省亦相

去不遠也閣下必有籌畫幸有以教之淑去歲有添募民壯演習烏鎗之請大府批司議革不行然在今日所關甚鉅原藁呈閱淑每恨庸材謀事不顧大體祇要彌縫其省小費雖錙銖不遺以爲忠及至釀成大事則糜國家之金錢官爵如泥土此從古志節之士所拊心大息者也調言及此當鍼於市唯拉雜摧燒之昨年雙珠在掌茲想玉雪亭亭歡喜無限茲因差家人赴許秋巖處特赴杭州老夫子處請安草泐佈達語無倫次伏唯鑒原并希轉呈虛躔先生一閱也

馮鷺庭大史二

違侍台顏於今十載馳念依依如在左右欣稔老世叔
直承明著作之暇讀東觀未見之書才藻喬煥照耀人
寰淑以鄙俗面目闊隔芳塵停雲落月永懷寤歎上春
接奉鈞函深感在遠不遺加之齒錄俗吏塵胷方竦惶
於奏記之艱不意遽接大老師訃音中懷悲慕益重念
老世叔來函方有圖乞養之請遽丁大故至孝沈痛何
以堪此唯祈以禮節哀且大夫子名德者年天下仰望
老世叔一門簪組侍奉榮祥所以仰慰大師母鸞鶴之
思者實在於此下懷不勝切懇之至淑近狀不堪言述

公家之急非僅恤緯之悲內顧之憂實深將及之痛里門近事已略具於虛躔先生函內想老世叔閱之必深所憫惻也肅函專奴奉慰唯祈台鑒附呈夏布二十端并希叱入臨穎馳切

林喜亭大守

閣下雄姿英發以經世之才承其家學展佈方州所至之處如鶴立羣如錐處囊而又胷襟洒落蘊藉使人一見傾服霞蔚雲蒸斷斷其不能久畱滯周南也惟叩祝閣下畱意人才使遇閣下者不拘一格皆得蒙齒錄有所成就則眾人之知能皆閣下之知能也又爲人擇地不爲地擇人者俗流不免閣下行卽大用汗青竹帛不朽之業分內事也願閣下圖其遠者大者迂闊愚忱伏惟鑒察

林喜亭二

自乙卯送別南浦之後歲月如駛倏逾六年思詠之懷
無閒旦晚僅能兩致書題稍通忱悃乃荷大兄在遠不
遺數賜手緘如郝六兄赴豫回一札懃懃懇懇纖悉不
遺而所以垂念不肖者真至之情無不溢於楮墨感念
之懷依風倍切徒以拙吏風塵終日鹿鹿無一善狀可
以遠慰知己懷抱作惡致成疎懶想閣下能鑒也昨冬
十二月復得賜函拜誦之下知上屆已膺卓薦刻下方
得入都卽日伏審台履綏吉龔黃之績上洽

宸衷

聖天子虛懷前席之時正值最報循良之會定知渥被
龍光觀察屏藩拭目俟之心頌翹切之至溯自閣下去
後丙辰之冬大案遂出其時上游謬採虛聲擬予灌城
一席本非淑所欲爲未幾擬新建又未幾變其說定予
玉山索多金彌豐城力辭不就是爲丁巳之夏不月餘
今中丞自粵莅西江下車之初廉不肖無狀兩次欲登
白簡一緣竊案一緣十八年前有上控一案批府未結
怒不可解賴錢潤齋大守陸樸堂廉使苦求得免淑心
本無忤而事故紛紜如此恨不卽棄此雞肋蓋五年以
來四乞引疾三求閑地皆不能邀允准比年以來每蒙

中丞稱其才而惜其有性氣且云彭令殊錯會吾特欲
成就之耳淑自思何才之有惟性氣之說吾受病深矣
當中丞甚怒時淑於六月左脅忽患手搭腫起如孟眞
垂危之症伏牀踰百日幸而不死當是時淑曾次海闊
天空心思明鏡止水惟思得與天涯海角故人豪傑劇
談笑語以俟天命其視一官眞不啻腐鼠也前劫已退
至戊午入闈得士十一人已而顏耘圃先生來江喜可
知也仍以灌城屬淑淑婉辭耘圃先生云君勿然未幾
先生遷直隸方伯此事遂中止亦正合淑意此別後以
來大概光景也淑接前任虧空三萬二千竭力彌補得

一半現奉清查倉庫已合盤托出本年新糧不准那掩
俟彙銷後再行覆奏淑不知將來如何交卸且不知准
卸事北上否亦聽之而已軍興以來秦蜀楚豫無寧日
宵旰憂勤眞志節之臣報

國立勛之秋也言事者多瑣屑不足採而當局君子說
得好聽也要行得去若止以一不要錢便稱好官便丈
六金身塞破世界有何益處閣下傲儻大略磊落光明
願勉旃爲濟世之良臣無愧幽燕豪傑也諸弟諸姪家
學通材自可俱及時自見以欣以慰徐午園處脂膏之
地有年此次木差雖丁憂不免極狼狽之至刻想已抵

津門曾雲溪志節之士有用之才而乃至於此其平生
好言兵卒以馬革裹屍成就正果爲渠哭又爲渠笑也
張蔚田大帥遂物故又失一名將淑與訂交二十年此
誠是

朝廷可惜人其靈櫬若未返祈爲淑以明水一盂瓣香
一裹致於靈前祝詞但云淑硜硜之節至死不變也大
兒富柁以縣丞發浙江本年正月到杭在三十九名二
兒人檀年十六頃令回里應童子試兩孫大者十一小
者九歲俱可讀書淑行年五十有四兩髻秋霜遲莫多
病惟願早脫宦海還我書生面目而已縷縷奉布不宣

再吉水有歲貢趙本潢爲邑中端正之士六年以來
均延其爲院師其子鶴聞庚子舉人自十數年前會
試入京卽未還家而三年以來竟不知存亡該舉人
緣負氣傲物不名一錢有傳其死於道路者有傳其
遁於山谷者其父垂暮之年朝夕悲傷昨又聞在河
南省城賣卜因王春浦先生乃其子座師而今河南
學使乃春浦先生之子具稟丐淑封申淑與王學使
素昧平生未便造次是以令其人賚函專投台端務
懇大兄札託省中凡江西會館與凡庵觀旅店查問
有江西吉水趙孝廉以星卜爲事者其身中面髯并

望於各府分札一詢倘得其人感且不朽其稟附覽
卽據情作札轉達學使并遣一役同來人投稟採訪
爲屬

張五峯

三得手書如親晤對深情宛轉名言絡繹宛見黃叔度
一輩使人不得言鄙事也秋爽氣清敬想興居多勝旅
進旅退森然與槐柳齊列之時恐此客不能無小異也
淑抵文江來瞬逾一月一盤壞局無從下手衣敗絮行
荆棘中殆不足喻何來札過譽云云近是以文爲戲然
開拓胷臆裨益見聞多矣頃來手口拮据體中殊復不
佳羝羊觸藩當不能進退之時自當著急然進將何之
退又焉往以此論量此中境界亦自有著脚處大約本
事不濟不過得委心任運彷彿而已承指敝署當改作

和漢外集 尺牘
處立冬後當次第料理更張處更張補苴處補苴心力
所不能到不復勉強以爲何如

張五峯二

前月得手槭并捧讀詠蘭長句手腕靈通心清目爽風
塵中得此奇珍有韓山片石之歎也夷使差務鹿鹿旬
日幸已平寧過吉漕事略得就緒大約此月半後可以
蕝事然七處之倉各種變態計兩月來對付精力可以
埽定峒蠻幾處真可謂小題大做體中疲劇肺氣羸弱
數日來稍可言之見笑然兄定念我耳前札委心任運
云云半屬興到之語敬佩良箴敢不努力部婁無松柏
恐不足以副期望若何聞有江州之委不知當去否淑
宦情如水生龜脫筒正爾良難旣受魔障不得不以定

力支柱耳蟾芝集一册寄上尙無副本閱後祈卽付還
又有長陽竹枝詞將付剞劂以應鄉人之請容續寄是
正惟雅鑒不一

張五峯三

三接雲牋鹿鹿未得裁答得不訝且笑耶兄履任以來
百凡暢順其素所蓄積者雖不必盡試於一邑然小用
小效固賢者之事知必不以百里爲不足治也每讀來
書所以爲弟勗者其言甚大而切近有體有用可見一
斑然今日州縣其接於耳目者無非笑端其中亦有大
段不得已處滔滔皆是立得定脚跟者能有幾人雖以
賢者處此不難於不肯從同而難於不會立異此非才
德兼優者不能辦宜邑廢弛已久改絃更張無取大驟
隨事制宜去其泰甚而已賤體及婦孺輩俱叨平善淑

體中較去年頗健唯兩鬢星星未免增牢落之感耳前
月三十日乃弟賤辰率成口號三首以示兒輩附呈以
供捧腹桃花春麗琴韻晝清姑射風標良深思詠

張五峯四

十四日清晨還署適錢湘船修撰同胡比部過境泊舟
見顧黃花大放張潯陽送鱗適到相與命酒劇談作竟
日之歡對二君有不異登仙之歎益想古人也三日來
爲兒女俗事碌碌忽展手書青原之遊旣不得與我偕
新詩三首胡不卽示乃令饒猿望果垂涎耶讀至幅末
得知文郎北闈捷音已到麟子鳳雛可勝欣羨乃我兄
札來言卽欲返旆恐諸兄必要喫喜酒卽僕亦不肯放
兄何不卽在郡中奉請我輩果然僕當卽命駕爲君醉
倒且續青原之遊尙能滋山水之情涉筆一和佳詠也

徐斗垣

役至展讀來函豈任感泐弟弋陽楚米變價一項緣五十四年署楊前任叅革廢弛之缺於四月初到任是時奏銷茫無畔岸而楊任無著虧空一萬三千有零此項變價銀一千八百兩弟仿照別縣詳請令楊任自行完繳已蒙藩憲准行在案奏銷出後七月底章公到任趕辦漕務弟又接署渠簾印至九月章公回任始議交代約計弟接楊任虧短之一萬三千交九千有零與章任實彌補四千有零東挪西借展轉遷延至次年二月始克上省而弟之受累從此深矣後到崇仁新建胡兄著

追楊任完繳前項楊任無賴至持刀尋死上憲均所聞知遂集矢於弟令其代認於時臬憲諭云楊文林設自刎而死豈不更要受累是以含辛忍受不期隨卽丁憂前年四月猶措繳八百兩始准回籍餘一千俟來江補完自去秋得補吉水而前任又係病故之缺無著三萬如何措手俗做吏刁神形交瘁夏閒奏銷竭蹶情形閣下所目擊也七月初始回縣又調簾差九月初甫能抵署又爲漕務著急此地漕事憊賴無倫而羽檄盈案催米催隨漕催五十五六七各年司道等款催本年地丁尙未破白而省倉所須費用一無設措昨不得已將本

年地丁報初三日起解三千兩而存櫃不滿二百各倉徵米之際來完納地丁者日不過數十兩殆將索我於枯魚之肆矣今此項銀兩又復如是緊急弟本欲將此項原委具稟藩憲正恐無益惹厭而我兄來札又關照殷殷如是弟復何言茲弟欲懇將明春夏廉俸請抵總之事有可以告天地鬼神而不可以告上憲者所謂啞子喫黃連苦在心頭也

某一

月杪接手教稔台履安祥爲慰惟臨川任內咨查之項自須當日監盤質明庶免賠累刻下曾否完納深爲繫念弟處情形竭蹶更深彙銷各項勉強趕辦而爲力尙懸誠如來諭無米之炊百端棘手且刻下青黃不接之際米穀騰貴月之廿日因公遠赴百里之鄉村報搶穀者竟至三十餘起隨卽駐於該處查辦四五日稍有端緒日來合境幸已寧帖雖各案得以操縱在手而發放尙費時日勞人苦況眞有不足爲外人道者倉中僅存穀三千零現碾閩米一千五百石遂一舉而空之而呈

請平糶者尙在延頸險危可慮如賒實急又非僅恤緯
之喻也署府邵郡公公事認真可敬喜亭之行不得握
手深爲歉然湖西觀察已於二十八日過吉水弟值往
各鄉催徵錢糧致未接見也草草裁答不宣

某二

月前接手檄當卽裁覆想已達典籤月之初二接到來
函稔眠食安善爲慰此閒搶穀案犯日有發放隨有拏
獲竟不能赴省藉圖親近殊爲悵悵關愛之語抑何深
摯也其推獎所不當其中知己之言真非外人所能道
至如向有圭稜年來馴致謹飭諸語使人泪落何者弟
世味本淡徒以飢馱遂嬰世網入官以來已越九載不
敢與眾賢角才力未嘗怵他人之我先安分守拙豪無
機心以求免於罪戾但落拓成性且以家居深山世守
儒素粗讀一卷之書未諳當世之務舉止生硬動違時

宜迨於經歷數縣百折千磨復丁大故顛沛流離人事
牽纏再如馮婦比莅吉水二年於茲骭骹頽壞剛柔莫
施豆腐裹灰敗絮叢棘措手之艱殆不足喻公私交迫
進退維谷何書何學何名何利蒲柳之質未老向衰世
故日深天機日淺畏首畏尾而此中遂茶然頽靡矣人
生知己實難喜亭天分高閣下閱歷久弟何足比數從
此益當勉力讀經世之書以求副兩兄期望也

秋潭外集卷第七終

秋潭外集卷第八

尺牘八

長陽 彭 淑 秋潭

提學趙鹿泉先生

淑僻在荆鄙家本儒素自年十二時卽已知有閣下後
出李文園馮星實兩先生之門又數從胡牧亭侍御還
往得以竊窺玉貌蓋畱滯都門者十載然後知天下所
共知者閣下之文章風采其隱然有不可奪之節雖賢
者猶未必盡知之也淑徒以陋學自慚無能請謁於左
右不意積三十年欽仰山斗之心忽以風塵面目得遂
摳衣之願其爲喜歡曷可言喻伏惟閣下功德如陳大

邱品望如韓吏部欽承

帝眷陶鑄羣材鸞鳳躍而韶護鳴景星爛而慶雲華不特文學之彥衣被實深德盛所及詩書之氣猶且沾丐於末吏惟大節戊申典試西江淑方署篆瑞昌己酉視學重任又署弋陽縣事俱末由一通誠款頃者甫到章門本府及僚吏輩多人與言閣下知有淑姓字且言吏弋陽時狀甚善夫以平生傾慕之人雲泥睽隔數十年無由一見乃於稠人中詢及姓字又以大賢而稱其善自問何人何以堪此極感極愧叩謁崇階荷蒙不遺葑菲殷殷訓示皆儒者中庸之言實平生罕聞之語才卑

識闇祗深慚沮淑一行作吏所謂以政學也乍到官守一切非其習惟常服膺儒先一命之士存心愛物之語又以人情不甚相遠以勤儉爲不敢得罪於百姓之本然所到之處迂疎寡效捫心自愧又況人所應無斷斷不能盡無何有真識定力不愧其職有足以當輜軒之採者乎然而淑滋愧又用自勉矣以庸劣無似如淑在弋陽時尚有以姓字欺閣下者從此畱心吏治事求其心之所安飢寒之不恤非笑之不顧可以答上官而對百姓者幾幾古人萬分之一有如閣下者其許可也必矣況今日眾賢相遇百務維新之時淑黽勉其中稍

可自効不悔遁而之他不中道而改路競競夙夜恐負
大賢則有始有卒以中材而不甘自棄皆閣下鈞陶之
賜也知憲節現已按臨吉郡伏稔鈞履吉綏目疾安恙
無任依慕之至

贛南觀察蔣礪堂先生

淑於二月十五日京旋泐函馳候起居三月初一日奉
委領運陝米續經稟知去後卽奉到鈞函荷蒙矜憐末
吏慰諭有加竝蒙恩私推念秋巖觀察規愛之意曲賜
訓誨情真語摯言簡意該其期望成全之盛心感激之
至不知所云自問何人何以得此於大君子惟有莊誦
紬繹佩爲箴銘內省返觀如承提命涇涇小人從此或
少知有學問進益之方不至任其迂直之性稍免愆尤
雖生死人而肉白骨之恩無以過是也

陳竹香

一別如雨六載於茲采葛停雲未足詠其勞積自得閣
下好音欣喜之懷無言可喻而未得一修報書固不敢
援慣遲作答之比而懷抱之美惡宦況之愉知老弟亦
當於此想見也伏惟閣下襟抱飄洒懷才蘊藉將幕稱
其上客赤縣頌其神君鴻毛順風羽儀

王國下風不勝景仰惟未稔已得補何地至念至念自
與閣下別後於壬子四月返楚癸丑秋仍來江右卽奉
題補吉水歷任所短數逾三萬而吏胥民風其黠桀傲
壞實甲於西江其故家風流埽地盡矣又其甚者漕倉

分七處遠或二百里近七八十里皆敝民姦吏蟠踞之
藪從來無一年完善者淑履任三月鬚爲盡白百計補
救百法撐持三年以來僅免隕越去歲甫能將從來所
短倉穀一萬五千碩全數彌補今年又值免糧計彙銷
尙差二萬皆須空中結構民間會無絲毫之助上游非
不徹底明白見面則空言歎賞差檄絡繹如故也大約
公事必期無悞而負債如山無臺可避此誠無可如何
之事唯自視名利淡然不能脂韋隨俗冀他日不至上
貽先人之羞下遺子孫之累所以報故人者如此而已
閣下才品有目共寶所冀安步徐行以綏百祿畿輔首

善沐浴維新禎祥和氣自當蒸蒸日上西江貌似完善
然緣飾已甚其實一年不如一年大可憂也湖南苗匪
未靖荆南亂民紛紛殊可駭怪家兄在里雖遣人探問
至今未得音信風鶴之警大損眠食秋冬之閒定謀引
疾矣家人朱祥回京省母已飭趨叩臺端渠有子求閣
下錄用可善視之也

陳竹香二

別近十年實勞思詠中間數承寄手書懃懇無已淑僅
得從郵遞附致兩緘非不勤念故人旣緣一無善狀可
慰遠懷而事與願違佛鬱之懷不堪縷述想閣下必以
臆得之不悵然於勞人疎懶也伏惟閣下圭璧束躬干
鑊應事北來好音暢我懷抱

今天子仁聖上媿

祖宗大憲一去中外肅清正賢良登崇之時閣下勉之
淑莅吉水遂經七載從千魔百怪中保全得廉恥良心
四字然前政所缺三數有餘僅能彌補一半雖在公無

負而私逋滿身年逾五十霜華盈髻四請引疾三乞閒地皆不能得兼又空拳赤手無家可歸地方雖幸有起色惟歷年已久今日調南昌明日調新建凡江西繁缺無不擬及以致訛傳時至吏役百姓終年惶惑真無如何也顏耘圃方伯知遇最深又爲時不久閣下遭遇定徵水乳想亦必言及淑近況一一淑亦俟大計本出後再定行止盜弄潢池

宵旰至勤我輩雖小臣寧無人心倉庫之事職守所在我輩雖鄙劣寧無性命漕弊所關

皇上實心實政我輩稍抱忠藎者如何以一清漕便可了事若

上以實求而下以名應是

堯舜在上而諸君子不自比於夔龍如國是何如青史何謀事者大半鮮通言事者十九可笑意者盡爲勢利起見而於本源之地無乃大薄已乎閣下當有以教我兒子富桷以縣丞來部分發恐未得來署省視父執便中望賜訓示一切俾得遵循二兒人植似可望其成兩孫男亦俱能句讀差以自慰家兄弟俱未來署年來凡百俱托平善勿煩錦念草泐佈候近安無任馳想附呈近刻各種惟晒政餘續寄不宣

謝東墅

已酉弋陽一別亦越九載道遠縣縣祗勞晤想側聽閣
下莅秦以來上下相孚深爲慰藉但必有所不肯爲有
所不屑爲有所不能爲而因有所不得爲者塵勞况瘁
可以想見經一番磨煉長一分道力知閣下所得不淺
矣弟壬子還里癸丑復來得補吉水虧空三萬有餘習
俗之做壞吏役之狡黠乃西江首稱今已四載其空已
彌補得三分之二一切粗似就理然兩鬢斑矣念欲引
疾而公項變爲私逋數至累萬且里門賊氛未靖無家
可歸是以至竟遷延但方寸未虧立脚已定寄語故人

知故我依然也秦蜀楚豫賊匪四延迄今尙未埽淨黃柏山卽弟里門之地家兄弟姪子輩俱在戎行帶領鄉勇堵截已經年餘幸舍閒一切俱叨平善近聞賊勢窮蹙不知旦晚得廓清否也小阮暫畱署中無能潤澤竊以閣下當策其專意力學上進必不至奇寶久蘊也慶陽郡公龔小韓先生弟雖未得識面昨得其著作讀之其言忠厚纏緜其學有體有用今日人物無出其右計與閣下必水乳矣萬里之外以身爲本珍攝起居以綏百祿不宣

龔縣尉

唐魏文貞楷書諫獵書大幅字畫端勁提挈褚歐之間對之使人肅然起敬紙墨古澤又所不論尾末題云貞觀六年壬辰又七月望日諫議大夫魏徵幅末有數印可辨者一文淵閣大學士此物乃閩舊姓所藏印尙新意爲安溪相國一曰亮工則周櫟園也幅端有趙清獻公題跋字體肥媚蓋雙鉤贗本然亦一好手所可疑者文貞於貞觀踐阼之初擢諫議大夫二年卽遷秘書監六年已晉爵鉅鹿縣公考唐諫議大夫階五品秘書監階三品遷官已越五年之久不應尙書舊官小銜且大

宗議封禪因公切諫而止長卿則方贊封禪者必薄其
爲人可知漢人諫書可取者多矣何獨取諫獵而書之
而又自署諫議於不爲此官之日恐文貞不若是之淺
也此書果出文貞宋元以來鉅公豈曾不寓目而無一
字及之比於其類迺獨一清獻題賞千年以來曾不一
到內府有是理耶唯閩中名輩用押章而不置議者亦
以書本可取重之以文貞見虎賁而想中郎以爲尙有
典型耳僕曉曉及之淺之爲丈夫矣本意致章門友人
一閱旣思可以不必茲特并手卷奉還恐致令友久待
未必有濟也病體委頓力疾草草以博高雅一笑

嚴洵陽

樂園先生兄丈閣下杪秋舟過花封見夫道路脩田野
治所以慰安行旅皆悅而願出於其途於時烽燧紛紜
警報雜還閣下方袴褶戎旅取賊首剗心肝往祭白河
而輿人之誦說尹在口淑誠慕樂因奉蕪賤布下忱於
左右以識傾嚮果辱垂鑑十月三日抵金州越五日卽
奉賜函冲襟雅度溢于墨楮倜儻英邁吾思劉越石陳
同甫不得而見乃欲於閣下庶幾遇之惟所以獎飾鄙
人者大過不敢當至其如蘭同心入林把臂山鳴谷應
松茂柏悅斯真鄙人所欲得投分於大雅者也亦起旬

有五日承寄示黃白河徇難詩悲壯沈雄固非工精
悅者所得彷彿亦曾有人以白河詩見屬淑因循不能
爲乃吾兄於戎馬倥傯之際優爲之深以歎服顧淑到
此間見聞皆別無日不思詠閣下迺至十月中旬日丐
主者收米船戶數百千人另須一番鈐束幾於日不暇
給十一月望前卽病大損眠食外受風寒內發肝氣至
二十六七日而劇不食者兩日徹日夜不寐者三日夜
陸遠亭進飲子且規以安心是藥淑笑領之至初二
日小差今遂得愈唯脾氣虛弱今正日在粥湯藥裹中
過日憶奉存問已將兩月尚艱於作答方切悚惶不圖

閣下非惟不以爲罪乃又取攜手教適於臘日奉到開
緘爛然讀之唯恐其盡觀閣下虛懷樂善誠有道君子
之盛節顧傾倒獎藉言出肺腑使淑得之慚愧欲死淑
鄙人也長自山陬學乏源本硜硜小人不通世務竊祿
一縣循分供職四字尙未得彷彿至於安分守拙乃迂
鄙之藏身耳蓋所用非其所習始嘗尤人觀人不如觀
我繼嘗自怨今乃自笑吾本爲衣食所迫以求一官吾
亦自食其力而已廉恥良心四字吾受病已深憂讒畏
罪吾朝夕懍懍而此心亦未嘗不坦然瑣瀆於閣下者
猥蒙虛佇行卽摳衣上謁使吾兄知我其中空空然時

尺牘
言時免有客笑爲羊公鶴也

李石泉

金州于役籍甚循聲公事冗瑣未遑脩問比奉柏溪先生來函推重大兄儒術吏治爲我輩光榮馳慕誠切無以爲喻不意遂承先施錫之手書侑以食品欣誦之下慙慙實深伏惟閣下保障巖邑撫字瘡痍揮絃聽訟上馬殺賊必有仁者之勇類非俗吏之爲企望清光誠以不得卽奉教言爲歎也弟荆楚凡材豫章下吏向曾敬事柏溪先生昆季實叨師友之益柏溪愛忘其醜以弟謬舉於閣下讀來教所述真令有識代弟入地柏溪樂道人之善閣下見善如不及皆有古君子之風旆之於

不肖則賢者之過矣淑經經小人無用於時一系
叢咎百端安分守己藏身於迂鄙之間五十飛騰精力
向衰暇時亦自覺面目可憎語言無味俗吏也而侈之
爲文人庸夫也而張之爲奇士吾不病狂喪心而不內
愧也乎雖然吾將以賢者之稱許爲愧而加勉不敢爲
小人之歸以辱知己則區區之心固在風雨如晦雞鳴
不已中心藏之何日忘之米已交清惟短具報漂沒五
百餘石只可回江料理歲內卽擬束裝遂不得一瞻道
範把臂入林期以異日四千里外竚聽好音病劇初起
草泐布復竝申謝懷臨紙溯回不盡

喻石農

中春京旋道出新蔡便得惠邀良晤高齋把酒逆旅挑
鐙非特所談非世人所聞嘗卽歌聲若出金石至今猶
琅琅盈耳也二月九日於德化郵函兩小詩敬想得塵
雅覽嗣於十二日抵章門正在還縣之次三月一日遂
有領運秦中軍米之檄莫非王事豈敢告勞身在下位
亦正可援義命以自安惟省住兩載京中又逋累數千
是役也寓中無宿糧老妻劇病垂危臥牀四十餘日適
大小兒試用浙江因差至常山便來歸省不得已命其
出文書覲告病假畱渠於寓中僕便投袂出門一系

怪可笑如此四月十日舟發章門十八日至黃州
女王城左近守風數日一葉亂江游西山向夜還舟可
于平生之快寺僧慧光恆安輩俱頗可與語渠乞詩甚
堅得數詩便畱與之刻閒未得寄示或閣下游屐時至
亦可得覽笑也小松侍郎竟未得晤都門雲素諸君子
亦未能寄一札去人事匆匆吾兄便信時可及淑近狀
一一爲屬二十日偶步入邠城學使者正按臨因尋訪
謝家羣從未得見面且知吾兄亦未乘輿入城殊爲悒
悒船窓草草布函奉聞附呈拙刻數種惟指正淑此行
朔襄鄖而上至興安交卸秋夕之際得以迴舟便爲至
幸因思去歲爲三萬白鏹擔馬今茲爲二萬米石受險
淑真麤材也不盡欲言惟至秦界得與引山通問又快
事耳

陳愚谷

江州一別不意遂十有五年中間人事多故音問闊稀而思詠之懷如在一日去歲京中晤雲素知閣下近狀甚悉二月初過黃梅訪石巖云吾子幾爲江西之游今不果而赴荊州又聞已奉大夫人尊諱可甚哀駭伏惟至孝白華營養綵服承歡數十年猶一日遽遭大故此宜吾黨所共助爲悲哀又何以奉慰孺慕然望閣下以禮節之也等身之書聞已刊行多種楚北舊聞不知得遂行否淑於閣下不足以供都養風塵鹿鹿艱辛萬狀此次京旋未浹旬又有陝西軍糈之役匹月丁、竹、牛、馬、

黃州聊布數行以道相思計淑至家樊可改書於荆
奉訊也匆匆不盡欲言惟乞爲道珍攝不宣

陳愚谷二

愚谷閣下十五年來魚來雁往不足解其勞結比因汎
舟之役泊船鄂渚得閣下似天外飛來快晤兩日各吐
其鬱勃胸中人生之樂復有過於此者乎吾子貞不違
俗拂衣二十餘年以來隱然有老松雲壑之意惜無萬
牛挽著滄江耳仙舟發後淑猶佇立江干望汎汎之景
者移時數日刺促之餘蓬窗瀏覽大著類考一書穴穿
線疋書有如此元元本本明人鈔撮類書夾雜杜撰不
值覆醬瓿坊間陋劣無論已惟湖北舊聞名輩頗復想
望旣已將次脫藁何不遂完此書續有見聞自下朱

氏之例再爲補遺若以卷帙浩繁
爲誰曰非
山自有桓譚之論況未必無好事者耶嗟乎愚谷吾觀
楊伯起之倫家傳一經隱居教授數十年不答州郡禮
問卒至身爲三公累葉卿相假使與愚谷同時正堪相
視而笑名德志節造物固不輕以相假值盛明之世吾
輩正宜也爲其難淑雖不能摳衣從閣下而所以自持
者猶可與良友相質也奉會五言八首錄本寄上稔愚
谷亦嘗爲此便望和示軍興小船已有端緒成行要在
月杪六月望當至襄陽覓便再爲問訊太岳集乞爲我
覓一部荊州名士如鯽魚也是何人望并示我

荆南觀察陳松門先生

淑違離釣顏已逾八載未能時修尺素恭問起居而依
戀之忱每若身衣左右伏惟閣下自撫綏有苗以及經
歷羞蜀楚豫戎行數載以久又以糧儲督運靡暇賢勞
屬以事務紛紜益徵福履綏茂淑於四月因差至武昌
始悉已奉

恩命駐節荆南欣慰之懷無言可喻惟南國之屏藩資
北門之鎖鑰劍戟鑄爲農器流亡復其田疇
宵旰無憂瘡痍皆起此誠我公仰承家學上報

國恩之素志尤淑與下里士民所

供職吉水今已十年濫邀四年卓異

年十一月行

卸事六年正月赴省交代明白八月得咨文北上十一月至京因有搭解部銀三萬二千兩都中甚爲拮据十二月引

見准其卓異本年正月出都二月中旬到省三月初一日奉委領運陝西第二批軍米二萬石茲於四月二十四日舟抵武昌因頭批船隻未齊等待換船過載尚需時日惟有小心慎重以期儻行妥速爲主耳至淑迂拙無能久邀憲鑑素荷恩私竊悔得受各憲栽培但救過不遑恐懼多端所處雖卑不_亦自棄惟祝閣下開藩建

節得以再出鈞陶之下庶木_曰竹頭不至成爲棄物矣工部主政陳君詩學問名德北楚第一流人也今因其主講荆南之便附稟請安惟祈鈞鑒

李雲門二尹

十月十八日自永豐于役言旋得奉手書欣知榮莅西
江甫卸征衣首詢吏治具見愛物之意雅邁時流而虛
衷及諒不吝謙光風塵塵凡中豈易得此然竊以爲誤
矣弟荆鄙猥士豪無挾持竊祿下邑不敢與才俊相後
先雖涇涇有餘而舉動迂謬多爲時賢所竊笑乃蒙過
聽不以爲怪且未通問於左右而輒先施手筆引靜山
之言以相獎重慚慙之懷莫可言喻無以仰酬高雅仍
祇以靜山爲將伯得效雖遲庶幾雅俗皆宜立於不敗
之地耳吾兄古調之彈在今日爲
之音

免爲翰音之朱博耳試語靜山當
七年精疲力盡名宦之心早已泊然行止卽在冬底決
定十晚來省當得握手傾倒歡聯縞紵今兩也

曹親家

崔盧世系王謝雲祜仰望之德久矣前歲忝與令弟爲
文字之契方次魯林瑤樹入我目中茲小兒來稟知在
都門又申之以婚姻鄙懷信爲慰藉惟小孫不過豚犬
兒卽忝壻名門竊有薦蘿之愧耳尊紀至惠賜手書懇
款勤拳三復之餘殊深佩服感令弟府報家人回未經明
晰告知是以遲閣今交來人賚呈至婚姻一節有禮俗
以不可少之文容少遲誼吉布聞通家至好自可均免
繁縟也

安南使臣阮侁

使至展玩手牋并覽書扇極妙欽佩使者風雅不羣兼
以歷攬山川著述甚富知東國聲詩不獨朝鮮使臣也
見前學問有限不足以啓發高雅鄙人雖風塵俗吏尚
能知音敬假大集一閱卽當拜復耳率此并候晚佳不

一

覆安南使臣阮侁

捧讀佳篇深歎風雅匆匆瀏覽不及輒命吏分手鈔錄
四鼓畢後以原集奉璧勞來使久待耳率書扇頭三絕
句云則恥志敬佩殊不成云塵吏之爲故無當於文章
之士也明晨若解纜稍遲或得江干一面否則咫尺千
里亦缺事也率此布復唯雅鑒不具

夕集

尺牘

秋潭外集卷第八終



